

Il pled svizzer da l'onn 2025

IA, Frauen-Nati, dazi e génocide èn ils plects svizzers da l'onn. Els han marcà il discurs en Svizra ed en sias regiuns linguisticas l'onn 2025 – analisads scientificamain e confermads da la tschern da las quatter giurias da linguistas e linguists.

Ils plects *IA*, *Frauen-Nati*, *dazi* e *génocide* èn ils plects svizzers da l'onn 2025. Sin il segund e terz plaz èn ils plects rumantschs *ballape da dunnas* e *vita pajabla*, en tudestg *Zollhammer* e *Chlorhuhn*, en talian *permacrisi* e *riarmo* ed en franzos ils plects 39% e *grève*.

«Il pled da l'onn 2025 metta en scena l'abbreviazion rumantscha IA che stat per intelligenza artificziala. L'abbreviazion duai pudair sa far valair envers quella tudestga u englaisa ed entrar en il stgazi da plects da mintgadi. En pli stat ella represchentativamain per la digitalisaziun ch'è essenziala per il rumantsch e ses svilup. Senza quella na po la IA betg emprender rumantsch e porscher utensils indispensabels per il mantegniment da la lingua», explitga Bettina Vital, la manadra da la partizion Lingua da la Lia Rumantscha che ha sustegnì la ZHAW per la tschern dal pled svizzer da l'onn.

Pled rumantsch da l'onn

Emprim plaz: **IA**

Cuntrari al term «intelligenza artificziala» na tutga l'abbreviazion IA anc betg tar il vocabulari da mintgadi. L'elecziun da quest onn la metta en scena per dar ad ella la schanza da s'establi. Cunquai che IA resta impurtanta, fissi deplorabel sche l'acronim englais u tudestg d'aventass normal. Plinavant stat il pled represchentativamain per l'impurtanza da la digitalisaziun dal rumantsch: senza quella na pon IAs betg emprender rumantsch, e nus la finala betg conversar en rumantsch cun ellas – ina cundiziun decisiva per ch'ina lingua minoritara restia vitala.

Segund plaz: **ballape da dunnas**

Vegnidas per restar. Il Campiunadi europeic da ballape da dunnas 2025 ha augmentà la visibilitad da las dunnas en il sport il pli derasà dal mund. La squadra naziunala ha demussà inschign e perseveranza – e quai cun ina goli grischuna. Ils idols feminins han motivà bleras dunnas e mattas da jugar sezzas. Dapi l'annunzia che l'Euro 2025 haja lieu en Svizra, registreschan ils clubs da ballape in ferm augment da giugadras. Gooooo!

Terz plaz: **vita pajabla**

Il mintgadi vegn adina pli char, ils custs da vita creschan ad in crescer: Bleras famiglias na chattan naginas abitaziuns pajablas, las premias da las cassas da malsauns vegnan mintg'onn pli charas, la chareschia augmenta ils custs da las vivondas, e causa ils dazis imponids da l'administraziun Trump cumbattan interpresas pitschnas e mesaunas svizras per lur existenza e per mantegnair las plazzas da lavur. Ina vita pajabla per mintgin:a è tant in desideri individual sco da l'entira societad.

En tut las linguas naziunalas

Ils plets da l'onn en Svizra tudestga èn 1. *Frauen-Nati* (squadra naziunala da dunnas), 2. *Zollhammer* (martè da dazi) e 3. *Chlorhuhn* (giaglina da clor).

Ils plets da l'onn en Svizra franzosa èn 1. *génocide* (genocidi), 2. 39% (dazis) e 3. *grève* (chauma).

Ils plets da l'onn en Svizra taliana èn 1. *dazi*, 2. *permacrisi* (crisa permanenta) 3. *riarmo* (rearmament).

Dapli davart il pled svizzer da l'onn: <https://www.zhaw.ch/de/linguistik/pled-svizzer-da-lonn/>.

Il pled svizzer da l'onn

La squadra da perscrutad:ras da la ZHAW ha analisà la banca da datas da discurs *Korpus Swiss-AL* e definì per mintga lingua var trenta plets ch'èn vegnids duvrads l'onn 2025 pli savens u a moda cleramain differenta en cumparegliaziun cun ils onns precedents. Ina giuria da profis da lingua tscherna ils trais plets ils pli marcants da questa glista, da propostas dal public e sin fundament d'atgnas experientschas. La finala demussa la squadra da perscrutad:ras co che quests plets èn sa sviluppads l'onn 2025 areguard il diever linguistic en Svizra e tge midadas socialas ch'els represchentan.

Contact

- **Direcziun strategica dal pled svizzer da l'onn**
Prof. Dr. Marlies Whitehouse, ZHAW Departament da linguistica applitgada, tel. 058 934 61 69, e-mail marlies.whitehouse@zhaw.ch
- **Giuria per il rumantsch**
Marietta Cathomas, M.A., linguista RTR, tel. 058 136 30 33, e-mail marietta.cathomas@rtr.ch
- **Giuria per il tudestg**
Prof. Dr. Marlies Whitehouse, professuressa per Professional Literacy, ZHAW Departament da linguistica applitgada, tel. 058 934 61 69, e-mail marlies.whitehouse@zhaw.ch
- **Giuria per il talian**
Dr. Angelo Ciampi, docent per talian, ZHAW Departament da linguistica applitgada, tel. 058 934 60 78, e-mail angelo.ciampi@zhaw.ch
- **Giuria per il franzos**
Dr. Nicolas Pepin, docent per franzos, ZHAW Departament da linguistica applitgada, tel. 079 300 56 41, e-mail nicolas.pepin@zhaw.ch